

BONO ANNADO

Que lou bèl an de Diéu 2016, vous mantèngue flòri de santa dins uno Prouvènço toujours quieto...



Prouvènço d'aro

Tóuti li mes, lou journau de la Prouvènço d'aro

Janvié de 2016

n° 317

2,10 €

Li crècho de Nouvè enebido

Li santoun samenon la terrou, après lis atentat terroristo de Paris, li Maire de Franço que s'acampavon, an tant lèu trouba la parado, l'interdicioun di crècho de Nouvè dins li bastimen coumunau de la Republico laïco.

La dangerouseta dóu Ravi es averado, pou-drié escoundre uno ceinturo d'esplousiéu soutu sa taiolo e li Rèi Mage te poudrien agué fa d'escoundoun un passage en Republico islamisto devers la Sirio...

Li conse de Franço n'en cagon dins si braio! De-bon i'a de finocho dins aquelo AMF, *Assouciacioun di Maire de Franço*, soun forço ócupa pèr sa founcioun mai trobon pamens lou tèms de faire bàrri i sànti-bèlli.

An li mot pèr lou dire, soun acioun sara "un puissant facteur d'émancipation de l'être humain" en afirmant que "La présence de crèches de Noël dans l'enceinte des mairies n'est pas compatible avec la laïcité."

Pèr acò demandon au ministre de l'Interior "une clarification législative" sus aquel item. Fau dire que la Justico, que fuguè sesido, se balancejo, un juge crido isso e l'autre crido molo... D'aquí l'ase de la Crècho rèsto tanca coume à soun acostumado. La Court amministrativo d'apèu de Paris diguè qu'uno crècho de Nouvè "doit être regardée comme ayant le caractère d'un emblème religieux" entre que la Court d'apèu de Nanto dis lou countrari en jujant que la Crècho de Nouvè "ne revêt pas la nature d'un signe ou emblème religieux".

Ansin l'Assouciacioun di Maire de Franço an en man lou coutèu tripié, aquéu que copo de tout caire, soun chaple dins li santoun de la crècho se pòu mena batènt avans que lou Ravi cridèsse à Diéu misericordo...

Pèr cop d'astre, lis eleicioun regionalo fuguèron un sauvan. Li candidat s'enganchèron d'entendre acò, la santounaio menaçado pèr si counfraire en poulitico, anavo pas lis ajuda dins soun acioun pèr daveru un sèti dins sa region... Tirèron en rèire e mant un Maire afourtigüé soun refus d'aplica aquel ordre laïque que se tremudavo plan planet en pichoto recoumendacioun d'un simple vademecum.

Basto! Aro, ounte que siegue, pèr la fèsto di Rèi, Gaspar emé sa bouito d'or, Marchoun emé soun encensié, e Bautezar emé soun pot de mierro arribaran encaro à la crècho, sus si camèu. E se troubara toujours aquí tanca, en santoun, lou Maire de la crècho emé sa bello cherpo, bèn estalourado sus soun ventroun redoun e soun estè escarabiha.

Micoulau Saboly, lou célèbre Mountelen, chantré immourtau de la Nativeta divino sara uros de saupre que la modo di crècho de Nouvè, fai toujours flòri en terro dóu Miejour, pèr apoudre, planta coume un image, sa noto estatuari is aubado enaurant l'Enfant-Jésu.

Bernat Giély

Un pople valènt



Uno nacioun emé sa lengo

Evviva a Nazione, Evviva a Corsica.

Pèr lis eleicioun regionalo i'a plus rèn à dire, fuguè en Prouvènço d'eleicioun naciounalo menado pèr li grand partit parisen. À guiso de descentralisacioun es lou cap dóu gouvèr que baiè sis ordre i candidat de la region... Basto ! vuet avèn un novèu president de la region *Prouvènço-Aup-Costo d'Azur*, Cristian Estrosi, un niçard de la bono... que manifestè en Arle en soustèn au Couleitiéu Prouvènço e n'en presentè meme soun libre "Sang e or". Adounc belèu que fara soun proun pèr ajuda aquéli que

volon sauva la lengo istourico de la region.

Soun proun, es li Corse que l'an fa pèr sourti dóu carcan parisen, an vouta à bèl èime pèr la listo independentisto. E lou novèu president, Jan-Gui Talamoni, tant lèu elegi manquè pas de faire soun discours en lengo corso pèr bèn se dessepara de Paris: "En voutant pèr li naciounalista, lou pople corse a di que la Corso èro pas un moussèu d'un autre país, mai uno nacioun, emé sa lengo, sa cultura, sa tradicioun poulitico, soun biais d'èstre au mounde".

Emai la sesiho dóu Counsèu regionau de Corso s'es acaba pèr lou cant de l'inne naciounau

corse lou "Dio vi salvi Regina".

Lou gouvèr francès qu'avié pas beca sus aquelo eleicioun, raubant lou salut proutoucou-làri i novèus elegi de l'Isco reguignarello, prenguè pamens uno estoumagado de se vèire arresouna sènso façoun: "Dise à Paris, au gouvèrnamen e à l'Estat: prenès la mesuro de la revoulucioun que la Corso vèn de vièure. Coumprenès enfin que tóuti li coundicioun soun reünido pèr que posque se durbi un novèu chapitre de l'istòri d'aquelo isclo". E lou proumié ministre, Manuèu Valls, de s'estavani quand ausiguè dire "óutendren l'annestio di presounié e di recercat. Deman li porto

di presoun se durbiran e degun poudra s'óupousa à-n-aquelo voulounta poupulàri", ié fauguè bèn segur rebeça pèr afourti l'autourita de Paris sus aquéu sujet "sur lequel nous serons intraitables: il n'y a pas de prisonniers politiques corses..." valènt-à-dire i'a degun à libéra, lou FLNC a jamai eisista... l'a d'enfourmacion que mounton pas à Paris... pecaire, lou gouvèr sabié pas rèn... subre-tout quand acò se dis en lengo corso. D'aquéli Corse sabon pas encaro que la lengo de la Republico es lou francès e rèn que lou francès, un bèl article 2.

J. Maltotier

Mèfi à la crècho de Nouvè

Sèmblo lou ravi de crècho, aquéu que nous lou dis emé serious...

Pajo 1

La Catalogno independènto

Li Catalan de liuen nòsti fraire van retrouba sa soubeiraneta...

Pajo 6

La temperaduro vai mounta

La COP21 nous es passado soutu lou nas... Fini la calourasso en 2020...

Pajo 12